

#### CAPUT IV.

##### RAGHUS PLAGAS EXPUGNAT.

1. RAGHUS, regnum a patre adeptus, valde splendebat, sicut ignis, sub diei finem splendorem a sole depositum recipiens.
2. Quem cum reges, post DILÍPAM, in regno stabilitum esse comperissent, ignis in cordibus eorum, qui antea fumo involutus fuerat, flammis quasi erupit.
3. Cives, prole gaudentes, illum nuper ad dignitatem regiam evectum videntes oculis erectis, gaudebant ac si INDREÆ vexillum sublatum conspicerent.
4. Paternum regis solium, totumque inimicorum regnum, utrumque simul ab illo, elephanti instar incedente, occupatum est.
5. LAKSHMIS, quamquam ipsa invisibilis, illum, qui ad imperium consecratus fuit, textit umbella, ex loti foliis facta, quæ sub pulchritudinis ejus splendore latuit.
6. SARASVATIS, sub panegyristarum forma nonnunquam appropinquans, laudandum illum laudibus idoneis extulit.
7. Tellus, quamquam inde a MANUE reges honorandi gaudium ex ea perceperant, tamen sub RAGHUE fuit, ac si nemini antea nupta fuisset.
8. Ille enim, quia juste castigabat, cujusvis hominis animum cepit, veluti Auster, neque nimis frigidus, neque nimis fervidus.
9. Quia virtutibus superior erat, ab illo patris desiderium in civibus diminuebatur, sicut *sahakâræ* fructibus diminuitur florum desiderium.
10. Viri morum periti in hoc novo rege honestum atque turpe illustrabant; prius quidem argumentum in eo erat, non vero alterum.